



## Mlango wa Matumaini kwa Ajili ya

### Wenye Dhambi

**N**a sisi tumeona na kushuhudia ya kuwa Baba amemtuma Mwana kuwa Mwokozi wa ulimwengu.—1 Yohana 4:14

Malaika wa Mungu walitumwa kuwatembelea wale wawili walioanguka na kuwaarifu kwamba ingawa hawakuweza kudumisha umiliki wa milki ile takatifu, nyumba yao ya Edeni, kwa sababu ya uasi wao wa sheria ya Mungu, hata hivyo, suala lao halikuwa limekosa matumaini kabisa. Hapa ndipo wakataarifiwa kwamba Mwana wa Mungu, ambaye alikuwa akiongea nao pale Edeni, aliguswa na huruma alipoitazama hali yao isiyo na matumaini, na alikuwa amejitua kujitwika Mwenyewe adhabu iliyokuwa stahili yao na kufa kwa ajili yao ili mwanadamu apate kuishi, kwa njia ya imani katika upatanisho Kristo aliotaka kufanya kwa ajili yake.

Kupitia kwa Kristo mlango wa matumaini ulifunguliwa kwa ajili ya mwanadamu, licha ya dhambi yake kubwa, kutokuwa chini ya udhibiti wa kudumu wa Shetani. Imani katika stahili za Mwana wa Mungu ingemwinua mwanadamu kiasi ambacho angepinga hila za Shetani. Angepewa rehema ambayo katika hiyo na kwa njia ya maisha ya toba na imani katika upatanisho wa Mwana wa Mungu, angekombolewa kutoka katika uasi wake wa sheria ya Baba, na hivyo kuinuliwa hadi katika hadhi ambayo jitihada zake za kushika sheria Yake zingekubalika.

Malaika waliwaelezea juu ya huzuni waliyoihisi mbinguni pale ilipotangazwa kwamba (Adamu na Hawa) walikuwa wameasi sheria ya Mungu, jambo lililofanya Kristo afanye kafara kubwa hivyo ya Uhai Wake Mwenyewe wa thamani.

Wakati Adamu na Hawa walipotambua jinsi sheria ya Mungu ilivyotukuka na ilivyo takatifu, na jinsi kuiasi kulivyofanya iwe muhimu kuwa na kafara ya ghali hivyo ili kuwaokoa wao pamoja na vizazi vyao kutokana na kuangamia kabisa, walisihii kuwa wao wenyewe wafe, au waruhusiwe wao wenyewe na vizazi vyaokustahimili adhabu ya uasi wao, badala ya Mwana wa Mungu mpendwa kufanya kafara kubwa hivi. Uchungu wa Adamu uliongezeka. Aliona kwamba dhambi zake zilikuwa na ukubwa sana kiasi cha kuhusisha matokeo ya kutisha. Je, ilikuwa ni lazima kwa Kamanda mheshimiwa wa mbinguni, ambaye alitembea naye na kuzungumza naye wakati yeye (Adamu) akiwa katika hali takatifu ya kutokuwa na hatia, Yeye ambaye malaika walimheshimu na kumwabudu, ashushwe chini kutoka katika nafasi Yake tukufu ili afe kwa sababu ya uasi wake (Adamu)?

Adamu aliarifiwa kwamba maisha ya malaika yasingeweza kulipia deni... Lakini Mwana wa Mungu, ambaye kwa pamoja na Baba alimuumba mwanadamu, angefanya upatanisho kwa ajili ya mwanadamu unaokubalika kwa Mungu, kwa kutoa maisha Yake kuwa kafara na kuibeba hasira ya Baba Yake. Malaika walimwarifu Adamu ya kwamba, kama ambavyo uasi wake ulikuwa umeleta mauti na aibu, uzima na hali ya kutokufa ingeletwa nuruni kupitia kwa kafara ya Yesu Kristo (The Story of Redemption, 46-48).